

HELBESTÊN DÎNIK

(Helbest)

Occo Mahabad

Weşanên AVA - 37  
Şiir: 13

Occo MAHABAD  
Helbestêن Dînik

Edîtör  
Çetin DURAN

Wêneyê Bergê

Berg  
Ronî WAR

Rûpelsazî  
Zeynep PARILTI

Çapa Yekem: Adar/ 2012

Matbaa  
Öztepe Matbaası Ltd. Şti.  
Kazım Karabekir cd. No:31/107  
Ulus/ANKARA  
Tlf: 0312 341 12 08

Ji bilî danasînê ji bilî destûra nivîskar û weşanxaneyê  
bi ti awayê nayê kopî kirin û belav kirin

ISBN

HELBESTÊN DÎNIK

*Occo Mahabad*

## **Naverok**

- 1.Qaçax... /7
- 2.Di şeva kambax de... /8
- 3.Bihêle bicehime here... /10
- 4.Baro... /11
- 5.Ez bibim “tu”yê te... /12
- 6.Çavêن te yên qehweyî... /13
- 7.Şerab... /14
- 8.Weyy delal weyy delal... /15
- 9.Ez xwe dikujim lê nikarim te bikujim... /16
- 10.Tu xerab û xerab... /17
- 11.Bi xatirê te... /18
- 12.Were nexeyide... /19
- 13.Ez ê dîn bim... /20
- 14.Ez dimirim... tu dimirî... /21
- 15.Pepûkê... /23
- 16.Neke... /24
- 17.Zanim... /25
- 18.Lê lê keçê... /26
- 19.Tehma zimanê te... /27
- 20.Çawa ye... /28
- 21.Ka bêje ez çi bikim... /29
- 22.Tu dikarî... /30
- 23.Îşev... /31
- 24.Ci yê min hene? /32
- 25.Hertişt... /33
- 26.Bajarek... /34
- 27.Şev... /35
- 28.Li ku ye? /36
- 29.Bi xêra Xwedê... /37
- 30.Bila... /38
- 31.Here... /39
- 32.Min... /40
- 33.Şa be... /41
- 34.Kevoka min... /42

- 35.Jinek... /43
- 36.Wez bimirim... /44
- 37.Wekî dengê xayinekî... /45
- 38.Ev bû... /46
- 39.Çavmorîkê... /47
- 40.Dendika min... /48
- 41.Ji bo xatirê çavêن te... /49
- 42.Dilo... /50
- 43.Cî dikim nakim... /51
- 44.Neçe... /52
- 45.Tu digirî... /53
- 46.Wisa... /54
- 47.Her stran... /55
- 48.De were... /56
- 49.Bihêle... /57
- 50.Kê... /58
- 51.Kuştin... /59
- 52.Tu zanî? / 60
- 53.Ji bîr neke... /61
- 54.Ax desto... /62
- 55.Xwezî... /63
- 56.Min bibe... /64
- 57.Helbestên dînik... /65
- 58.Tenûr... /66
- 59.Vê sibehê dîn bûme... 67
- 60.Zimanê min... /68
- 61.Şekirê qendîlê ez im... /69
- 62.Lê bêyî xapandinan... /70
- 63.Bike... bêje... /72
- 64.Ziman nîne... /73
- 65.Ka guhdarî bike... /74
- 66.Tu bibe dêlika min... /76
- 67.Em derewkar in... /77
- 68.Beden... şev... ew... /78

Ji bo dendika min...

## Qaçax...

li ser sînga min  
şopêñ destêñ te  
kor û lal û kerr...  
li ser zimanê min  
germahiya devê te  
kesk û sor û zer...  
li ber laşê min  
çavêñ te qaçax qaçax dikenin  
tu qaçax qaçax şâ dibî  
evîn qaçax  
qêrîn qaçax  
tu qaçax...  
li ser laşê te qaçaxek  
qaçax qaçax xwe dide te  
qaçax qaçax di erdêñ te de xwe vedîşêre  
awirêñ te qaçax  
hezkirin qaçax  
ez qaçax...

## **Di şeva kambax de...**

dest pênûs e  
laş kaxiz e  
dil name ye  
şev mijar e  
di şeva kambax de  
xewa min nayê  
min bike çîroka xwe  
min binivîse...

dev germ e  
awir dîn e  
diran bêtirs e  
lêv şewat e  
di şeva kambax de  
xewa min nayê  
min bike gula xwe  
min bêhn bike...

bejn mast e  
ken xayîn e  
hembêz agir e  
goşt xizan e  
di şeva kambax de  
xewa min nayê  
min bike mîweya baxçeyê xwe  
min bidize...

daxwaz bêşerm e  
can parsek e  
tu derya yî  
ez masî me  
di şeva kambax de  
xewa min nayê  
min bike nêçîra xwe  
min bixapîne...

## Bihêle bicehime here...

hertiştî bihêle û here  
careke din neyê van deran  
careke din destên wê negire  
devê wê maç neke  
nekeve paşila wê  
hertiştî bihêle û here  
çavên wê  
awirêن wê  
lêvêن wê berde  
bihêle bicehime here...  
bila kes te nebîne  
bila kes te nizanibe  
bila kes te hîs neke  
hertiştî bihêle bicehime here...

## **Baro...**

Li ser xatirê Baroyê Brukî û Evdal Begê Mîrza Xan...

ax kewê bila Baro di nava çavêñ te de bimire  
ax bila Baro di nava awirêñ te de xwe bişewitîne  
ax bila Baro li ber deriyê dilê te bibe xulamek...  
tu bi tenê bibêje “BAROKÊ MIN”  
kewê te emrê min xwariye kewê...

## Ez bibim “tu”yê te...

ez bibim “tu”yê te  
tu bibe “ez”ê min  
ez bibim “derdê” te  
tu bibe “dermanê” min  
ez li zozanêن te bigerim  
tu li ser çiyayêن min  
ez bibêjim “nanê” min  
tu bibêje ”ava” min  
tu bişewite  
ez bişewitim  
em agirê hev bitemirînin...

## Çavêن te yên qehweyî...

di xewn û xeyalên min de  
çavên te yên qehweyî  
bi min re dileyizin  
min radimûsin  
rihê min dişewitînin  
ez îro bûme qehweyî  
qehweyî bûne ez...

## Şerab...

şerab çavêن te ye  
bêhna te ye  
ez te vedixwim  
dibim serxweş  
şerab kenêن te ye  
awirêن te ye  
ez te vedixwim  
dibim evîndar  
dibim dînik...

## Weyy delal weyy delal...

weyy delal weyy delal  
evîna me klamek bû  
çiqasbihata gotin  
min têr nedikir  
çiqasbihata lêxistin  
min serimest û dîn dikir  
weyy delal weyy delal  
devê te sekirek bû  
çiqasbihata mijandin  
min têr nedikir  
çiqasbihata gezkirin  
min serxweş û dîn dikir  
weyy delal weyy delal  
min digot tu dilê min î  
min digot tu jiyana min î  
ha min digot min digot...  
weyy kubara min weyy  
weyy nezana min weyy  
eşqa me rûbarek bû  
çiqas biherikiya  
ewqas mezin dibû  
weyy min digot  
derdê min tu yî  
weyy min digot  
emrê min tu yî  
weyy delal weyy delal  
tu delala min î  
weyy delal weyy delal  
tu nezana min î...

## **Ez xwe dikujim lê nikarim te bikujim...**

ez xwe dikujim lê nikarim te bikujim...

xerîba min...

dendika min...

çavmorika min...

dînika min... rindika min... xweşika min...

birîna min... min... dermana min...

ez xwe dikujim lê nikarim te bikujim...

hesreta min... yara min...

## Tu xerab î xerab...

evîn bi fêlan  
evîndarî bi derewan  
eşq bi tenêtiyan  
ez bi derd û qehran  
dil bi xapandinan  
ax dilê min tu xerab î xerab  
bi derewan xerab î  
bi fêlan xerab î  
ez te nikarim  
nikarim derewên te  
nikarim fêlên te...  
ax gurçika min  
tu xerab î xerab...

## **Bi xatirê te...**

Îşev dilê min... çû  
îşev dilê min... mir  
Bi tenê êşeke mezin ma  
Bi tenê... eş  
Ev eş min nekuje baş e  
Bi xatirê te dilê min  
Bi xatirê çavên te  
Bi xatirê kenên te  
Bi xatirê maçên te  
Bi xatirê te...

## **Were nexeyide...**

wez kulîlka bajna te me  
were nexeyide...  
wez birîna dilê te me  
were nexeyide...  
wez xulamê bêhna te me  
were nexeyide...  
wez koçerê zozanê te me  
were nexeyide...  
wez qaqlîbazê behra te me  
were nexeyide...  
dilê min ê evdal nede girînê,  
dilê min ê belengaz neşewitîne...

## **Ez ê dîn bim...**

Ez ê dîn bim  
Tu tuneyî ez ê dîn bim  
Çavêن te yên xweşik tune  
Ez ê dîn bim  
Dînika min  
Dînîtiya dilê te tune  
Ez ê dîn bim  
Kenêن te yên dînik tune  
Ez ê dîn bim  
Ez ê bê te dîn bim  
Tu tuneyî ez ê dîn bim...

## Ez dimirim... tu dimirî...

zimanê min  
 di kolanên taxên te de  
 bi sloganan diqîre, dikene  
 îşev jan dide tenêtî  
 harbûn hemû melodiyan dikuje  
 kuştin bixwe jî tê kuştin  
 destê min  
 di bihuşa te de  
 stranên koçkirî distrêr  
 dema dînbûnê hatiye  
 îşev êş xeyidiye  
 bextewarî bûye çivîkek  
 di asîmanên te de difire  
 dengê bilûrekê berdûşt  
 tov bi tov  
 gunehan belav dike  
 navê şermê hatiye jibîrkirin  
 şerm xeyidiye  
 di stêrkên porêñ te de  
 bêhna bedena xwe dibînim  
 ez wekî penaberekî  
 dixwazim di axêñ te de  
 hêlînek ava bikim  
 tu di nava ax û feryadan de  
 xwe davêjî li ber peravêñ min

perav dibe şil  
perav diweste  
baranek dibare  
dilop bi dilop  
bi ax û nalînan  
naxwazim xwe rizgar bikim  
ji kolanê te yên şewitî  
ji taxên te yên germik  
niha nameyeke sêwî û windabûyî  
di paşila te de  
li ramûsanê xwe digere  
paşil bûye şil  
şil bûye derman  
îşev pîroziya şewatê  
kul û xeman dikuje  
bayê evîna te  
şewata dilê min mezin dike  
nivîn dişewite  
bihûşa te dişewite  
ez dimirim... tu dimirî...

## Pepûkê...

pepûkê pepûkê  
tu digirî  
ez digirîm  
tu dikenî  
ez dikenim  
pepûkê pepûkê  
bizane ku  
jiyan  
çend roj bidome jî  
xem nîne  
tu hebî  
ji min re bes e...

## **Neke...**

Neke  
Min hembêz bike  
Min bibexşîne  
Min kir tu neke  
Neke  
Destê min bernede  
Ji dilê min nefire neçe  
Cana dilê min  
Tu neke...

## Zanim...

“Xeta ya min e  
Sûc yê min  
Guneh yê min”  
Gotinê evînê xapînok in  
Zanim...  
Ez hatim xapandin  
Zanim...

## Lê lê keçê...

lê lê keçê bavkafirê  
nikarim te têxim gora dilê xwe  
nikarim  
awirên te  
kenêن te  
germahiya te berdim  
tu jî bernede...  
lê lê keçê malixerabê  
tu tişt  
wekî destêن te min aram nakin  
tu tişt  
wekî dengê te min bextewar û şa nake  
lewma nikarim bê te bijîm  
tu jî nejî...  
lê lê keçê delalê  
nikarim ji te dûr bisekinim  
çavêن te  
lêvêن te  
maçêن te dixwazim  
ez te dixwazim  
nikarim dilê xwe bikujim  
tu jî nekuje...

## **Tehma zimanê te...**

Min bêriya tehma zimanê te kiriye  
Tehma zimanê te min bernade  
Min bêriya bêhna devê te kiriye  
Bêhna devê te ji hişê min dernakeve...

## Çawa ye...

Ev evîneke çawa ye ku  
Keneke xweşik  
Awireke germ  
Maçeke xeşîm tune  
Ez fêm nakim  
Ev evîneke çawa ye...

## Ka bêje ez çi bikim...

delal ger tu ya min nebî ez çi bikim delaliya te  
ez çi bikim dev û lêvên te  
ez çi bikim bejn û bala te ya xweşik  
ez çi bikim ken û awirê te  
delal ger tu ya min nebî ez te çi bikim  
ez çi bikim deng û hilma te  
ka bêje ez çi bikim  
ez ê bibêjim: ji min re çi  
ez ê bibêjim: de here  
ez ê bibêjim: bi xatirê te  
delal ger tu ya min nebî ez çi bikim xweşikiya te  
ez ê te nebînim  
ez ê nenêrim çavêr te  
ger tu ya min nebî ez ê te çi bikim  
ka bêje ez ê te çi bikim...

## Tu dikarî...

Tu dikarî

Bi evîna xwe birînên min ên bi salan baş bikî

Êşen min ên qalikgirtî bi dawî bikî

Destêن min ên vala bi dilsoziya xwe bigirî

Lêvên min ên qermîçî û qelişî bi maçêن xwe aram bikî

Tu dikarî?

## Îşev...

Îşev dilê min firarê laşê te ye  
Zîncirê şermê şikandiye  
Ka bisekine  
Bila firar bike  
Ji bo maçkirin û hezkirinê  
Ka bisekine  
Bila bireve  
Ji bo hesretşikandinê  
Bireve dilê min bireve  
Bireve lêvên wê  
Bireve hembêza wê  
Bireve germahiya wê  
Bireve lîstikên nivînê...  
Qet nesekine... Bireve...

## Çi yê min hene?

Jî xeynî te çi yê min hene?

Tu jî herî ez ê çi bikim

Ka bêje

Ez ê çi bikim?

Min rondikên xwe barandibû li ser pelên te  
Bila ew rondik xenimî te bin...

---

Zimanê te wekî xezalekê baz dide  
li ser çiya û newalên min...

---

were birînên min maç bike  
yara min yara min  
yara min a biçûk...

Karxezalê tu bibe behr ez bibim qaqlîbaz...

## Hertiş...

Hertiş ji bo qurteke evînê û  
ji bo parkiyeke eşqê bû  
Niha di qirika min de bi tenê  
Bêhn û tehma te mane...

## Bajarek...

Bajarek bifikire ku  
di nav de ez  
bêkes û tenê.  
Te difikirim  
te digerim  
te dixwazim  
hesreta te dikişnim.  
Bajarek bifikire ku  
bê te bi hertiştên xwe min dixiniqîne  
tehma jiyana min jehr kiriye.  
Bajarek bifikire ku  
bûye hepsa min  
ez bûme mehkûmê wî  
dest û lingên min girê daye  
min dixapîne.  
Bajarek  
ez û tu  
eşq û tenêtî  
hesret û gazin...  
Çi bibêjim  
tenêtî ji her alî ve min dikuje  
Bizanibe ku ez dimirim  
saet bi saet  
roj bi roj ez dimirim  
tu tune yî  
ez dimirim...

## Şev...

Çiçikên qemer, qerqaş  
Lêvên werimî, sor  
Eniyên xwêdandayî, şil  
Tevgerên cur bi cur, cuda cuda  
Porêñ belawela, xapînok, reş û reş  
Zimanên hevgirêdayî, nerm  
Qêrîn, ax, oxêñ dînbûyî, bilind  
Baran... Brûsk... Lehî...  
Şev... Şev... Şev...  
Ta ku em têr nebin  
Neqede... Neqede... Neqede...  
Şev... Şev... Şev...  
Ta ku em têr nebin  
Neçe... Neçe... Neçe...

## **Li ku ye?**

Tehma zimanê te li ku ye?  
Bêhna devê te li ku ye?  
Xwedê bela xwe nede te  
Tu li ku yî?  
Tu yê kengê werî?  
Bajar li benda te  
Ez li benda te me...

## Bi xêra Xwedê...

Çi dibe

bi xêra Xwedê

deriyên dergehê xwe veke.

Veke, ez ê wekî feqiyekî nû û ecemî

der û dora warêن te tewaf bikim

bi navê eşqa Xwedê.

Veke, ez ê nimêja evînê bikim bi awirêن te

bi azana sibehê ve.

Veke, ez ê wekî evdekî gunehkar û windabûyî

xwe bavêjim ber bextê te

bi zikîrêن xwenenas û serxweş ve.

Veke, ez ê diayêن giran û giranbiha bikim

ji bo maçêن germ û wehşî

ji bo kenêن ecêb û xweşik.

Çi dibe

bi xêra Xwedê

Ev rihê min ê gunehkar û rêderketî

bi hembêza xwe

bi germahiya xwe bipêçe.

Çi dibe

bi xêra Xwedê

deriyên dergehê xwe veke...

## Bila...

Di tarîtiya şevê de  
dimeşim li nava kolanê  
bêdengiyek jehra xwe vedirêse rûyê min  
Bayeke hênik maçên te tîne lêvên min  
Hewa sar e, dicemidim, bêriya te dikim  
Destêن min mîna pişikên bêxwedî diricifin  
Germahiya te hîs dikim, te dixwazim  
Laşê min dilerize  
di destêن min de boyaxêن plastîk  
di devê min de straneke jiberkirî  
dixwazim navê te binivîsim  
bejn û bala te xêz bikim  
li ser dîwarêن kevn û derdkêş  
Bila niştecihêن vî bajarî min efû bikin  
Bila dîwarêن êşkêş min efû bikin  
Ez ê tarîtiya şevê bi xêzkirina rûyê te ronî bikim  
Ez ê bêdengiya kolanê bi nivîsandina navê te xera bikim  
Ez ê wekî zarokekî şanzdeh salî navê te biqîrim  
Bila şev min efû bike...

## Here...

Here lê here  
Here ku ez te neşikênim  
Here ku ez te nedim girînê  
Dilê min pir tijî ye  
Ji derdê te  
ji kerba te  
Here ku ez li ser te neteqim  
Here ku ez te neêşînim  
Çi dibe here  
Nebêje çima  
Min bi tena serê xwe bihêle  
Min bi qehrên xwe bihêle  
Nebêje çima  
Here...

## Min...

Min birînan berhev dikir  
birînê zarokên sêwî û bêxwedî  
min êşan kom dikir  
êşen dêlikên birçî û tazî  
min derdan vedişêriya  
derdêن kesên tenê û perçiqandî  
Ez dibûm dengê bindestan  
min ken û xêmgîniya wan dianî zimên  
Bi wan re digiriym û dikeniyam...

## Şa be...

Ez li nava evîneke bêçare mame  
 şa be şa be  
 te ez kirime xulamê çav û mijangên xwe  
 qet nebe  
 lêvên xwe yên zalim bîne  
 qet nebe  
 lêvên xwe yên agir û pizot bide  
 ez gez bikim  
 ez sor bikim  
 wekî du ewrên hesretkêş  
 em hev maç bikin  
 em hev hembêz bikin  
 wekî Adem û Hewayê  
 sêvên qedexekirî bixwin  
 bikevin gunehêن kûr û bêdawî  
 Bi gunehêن cehenemî  
 em hev biafirînin  
 hev nas bikin  
 hev bibînin  
 Netirse  
 Lêvên xwe bîne  
 dibe ku em werin lenetkirin  
 dibe ku em werin qewirandin û şewitandin  
 ez razî me  
 tu bi tenê lêvên xwe bide...

## Kevoka min...

kevoka min  
nedihiştin  
tu li esmanên xwe  
bi per û baskên xwe azad bifirî  
têl û dîwarên çargoşe ji bo te hatibûn amadekirin  
kevoka min  
nedixwestin  
tu bi can û awaza xwe azad bijî  
çek û tifingên xwe ji bo te diteqandin  
kevoka min  
tu canê min î  
tu dilê min î  
nekeve kemînê  
gurên har nabin bira...

## Jinek...

jinek

li ber qeraxa şevê

bi hestêن hovane

evîna xwe kêr dikir

jinek

li ber qeraxa şevê

bi fikrên erjeng

esqa xwe dixeniqand

çîrok wiha hat nivîsandin

“dilekî xapandî li ber qeraxa şevê bi kîrkirî û xeniqandî hat dîtin.”

## Wez bimirim...

Xwediye lêvên qelişî  
Ez im ez  
Ka jê bipirse  
Çawa hatine qelişandin  
Li destêr te ez hebûm  
Li devêr te dîsa ez  
Ka ji wan bipirse  
Bêriya çi kirine  
Wax wez bimirim  
Ew dev bêmaç maye  
Ev lêv bêgez maye  
Wax wez bimirim  
Ew dest ew çav  
bêsewda  
Di nava derdan de mane...

## **Wekî dengê xayinekî...**

Birçîtî

Belengazî

Koletî

Mirinên reş ketibûn para me

Êş û elemên cîhanê dabûn destêne me

Derd û kulên komkirî avêtibûn ber lingên me

Lê ya rast

Tu tişt

Tu felaket

Wekî dengê xayinekî me nedîêşand

Me parça parça nedikir...

## Ev bû...

Bajarekî şewitandî  
Mirovên kuştî  
Der û dorêñ bombekirâ  
Evînêñ qedexekirî  
Ev bû jiyanâ min  
Ji ber hezkirinekê  
Min dikirin Îsa  
Dihatim kevirkirin  
Li nava meydanê dadiliqandin  
Bi gunehêñ hezar salan dihatim súcdarkirin  
Ji ber sewdayekê  
Li nava meydanê dihatim şewitandin  
Civatek bi kuştina min xwe paqij dikir...

## Çavmorîkê...

Çavmorîkê  
Veqetînek bû evîn  
Çavêن girî  
Esmanê bêdawî  
Rêyên dûr bû  
Dizanim  
Dawiyê  
Her rê digihîş destêن te yên biçûk  
Her hesret di hembêza te de bi dawî dibû  
Tu digiriya  
Min hêstirêن çavêن te vedixwar  
Te nifiran dikir  
Ez dikeniyam...

## Dendika min...

Dendika min dîsa şev hat  
Dîsa ez bûm dîn  
Divê kiras û fistan werin cirandin  
Divê lêvên têrgoşt werin mijandin  
Divê sêvên gihîştî werin xwarin  
Divê laş di nava vê behrê de were şuştin  
Dendika min dîsa bagerek derket  
Dilê min ê tolaz ji dîn û îmanê derxist  
Divê şerbata evînê were vexwarin  
Divê bilûr were lêxistin  
Divê erdêن te werin avdankirin  
Divê şev dîsa biheje û bilerize...

## Ji bo xatirê çavêن te...

Min sazê xwe şikand ji bo xatirê çavên te  
Min xwe winda kir bi devê te yê şekirî  
Ez ketime nava agirê te xwe dişewitînim  
Gelo ez kî me niha  
Xwe digerim lê nikarim bibînim  
Ka bêje ez ê niha çi bikim  
Ne dikarim te bibînim  
Ne dikarim te birevînim  
Ne jî dikarim dev ji te berdim  
Ez rebenê reben ketime derdekî  
Nikarim xwe jê xelas bikim.  
Nikarim bicehmim herim  
Ka bêje cano ez ê niha çi bikim...

## **Dilo...**

Dilo dilê min ê reben û brîndar  
Dilê min ê dînik  
Aha ji te re dilê min  
Çi dikî bike...

## **Çi dikim nakim...**

Çi dikim nakim tu pêşîra min bernadî  
Roj dibe xwarin heram e  
Şev dibe razan  
Porkurê  
Ev halê min ê kambax  
Ev girîn  
Ev hawar  
Ev gazin  
Ji rûyê te ne...

## Neçe...

Neçe  
Ger tu biçî  
Ez ê xwe bikujim  
Ez nikarim  
Bêyî çavêن te  
Bêyî kenêن te  
Bêyî awirêن te bijîm  
Ger tu biçî  
Ev bajarê nelet  
Ev bajarê heram  
Dê bibe şahidê mirina min  
Neçe  
Ger tu biçî  
Ez ê xwe bikujim  
Ez nikarim bêyî te bijîm...

## Tu digirî...

Biçûka min  
Tu negirî  
Tu digirî  
Bahozek derdikeve  
Bajarên dilê min hildiweşîne  
Tu digirî  
Lehiyek derdikeve  
Zevî û baxçeyên dilê min talan dike  
Tu digirî  
Dinya ji min re dibe jehr û cehenem  
Hertişt diquerise...

## Wisa...

Min bi maçên xwe sor bike  
Min bi maçên xwe biêşîne  
Wisa biêşîne ku ew êş bi mehan derbas nebin  
Di bedena min de  
Bi min re bijîn  
Min bi gezên xwe qulqulî bike  
Min bi gezên xwe parce parce bike  
Wisa gez bike ku ew birîn bi salan derbas nebin  
Di bedena min de  
Bi min re bijîn  
Her maç her gez  
Bibe hêstir bibe hesret  
Te bîne rihê min ê birîndar  
Te bîne hişê min ê tevlihev  
Te bîne bedena min a êşbaz...

## **Her stran...**

Her stran hinekî naskirin e  
her stran hinekî hezkirin e  
her stran hinekî evîn e  
her stran hinekî bêrîkirin e  
her stran hinekî êş û birîn e çavreşa min...

## De were...

Qîzê tu çima îşev nayê  
De were em serhildanê laşên xwe biqedînin  
De were em nivînan bişewitînin  
Qîzê te îro soz dabû  
Ka tu yêbihata  
Were em rût û tazî şoreşan çêkin  
Qîzê vir de wir de negere  
Were em tîbûna laşên xwe bi dawî bikin  
Qîzê nekeve li pey jinik minikan  
Were bibe merhema şeva min  
De were em birînê dilên xwe bikevînin  
Qîzê laşşewitîyê hestşewitîyê malşewitîyê  
De were em hesreta çend rojan bişikênin  
De were em êşên canê xwe rehet bikin  
Qîzê were min dîn neke...

## Bihêle...

Kafirê bavkafirê  
Bihêle ez herim werdeka xwe  
Werdeka min nexwêş e  
Werdeka min birîndar e  
Werdeka min li benda min e  
Zalimê bavzalimê  
Bihêle ez herim  
Ez reben im  
Ew reben e  
Em reben in  
Qaza min biçûk e  
Qaza min bêkes û nezan e  
Qaza min şêrîn û şekir e  
De bihêle ez herim  
Ez neçim ew ê bimire  
Ez guneh im  
Ew guneh e  
Em guneh in  
Xerabê bavxerabê  
Çavêن te birijin  
Te nehişt ez herim berxika xwe  
Te nehişt ez herim derdê dilê xwe  
Te nehişt ez herim sebra dilê xwe...

## Kê...

Kê çavêن te derxist?

Te

Kê serê te şikand?

Te

Kê te perçiqand?

Te

Kê te firot?

Te

Kê derd û kul da?

Te

Kê kezeba te şewitand?

Te

Kê mala te xera kir?

Te

Kê te fêm nekir?

Herkes...

## Kuştin...

Rojek  
Me hev kuşt  
Çima  
Çawa  
Kengê  
Nizanim  
Lê  
Rojek  
Me hev kuşt  
Min çivîkên dilê wê  
Wê qaqlîbazân dilê min kuşt...

## Tu zanî?

Dîlberê, zalimê, kafirê  
tu zanî?  
ez xewnên xwe yên aloz de  
bi memikên te  
bi devê te  
bi laşê te yê germ û narîn re dileyizim.  
tu zanî?  
her şev dest û lêvên te dibin mevanên min  
ez her şev bi kenên te yên zarokane şâ û bextewar dibim  
roj dibe  
em hev dibînin  
tu li min dinêrî  
ez li te dinêrim  
tu dibêjî ”heval”  
ez dibêjîm ”dilê min”  
tu weke hevalekê tevdigerî  
ez wekî evîndarekî har û dîn  
lê tu nizanî  
ez her şev laşê te diperçiqnim  
ez her şev bi te re radizêm  
ez her şev bi te re dileyizim...

## Ji bîr neke...

Ew awirên jehrî ku me ji hevdu veqetandibû  
ku dilê min di dilê te de zeliqandibû  
êdî min bêzar dike...  
Di bin ewrên sayî de  
Di bin xemgînî û dilşikestinê de  
Bi şermek xweşikî  
bi nêrîneke agirî  
bi keneke rêderxistî ve  
min destêن te digit...  
Êdî ew bi tenê xeyal in erê bi tenê xeyal.  
Min ji bîr neke  
destêن min ên şermokî ji bîr neke  
Nivîngeha ku me lîstikan diafirand ji bîr neke  
Çavêن min kenêن min nêrînêن min ji bîr neke  
Evîndarê bi xatirê te... Min ji bîr neke...

## Ax desto...

ax ax desto desto  
desto te ez kuştım desto  
desto destên min bernede  
min wêran û dêran neke  
min belengaz û sefîl neke  
tucarî  
qet  
destêن min bernede  
bihêle bila baran bibare me şil bike  
me dîn bike  
me ji rê derxe  
ax delalê dînê  
ez ketime derdê te  
ez ketime jana te  
ez ketime dev û lêvên te  
bihêle bila dilê min bi têra xwe biqîre  
bibêje ku ez ji bo te dimirim  
bibêje ku min bernede  
ax bihêle bila dilê me bigihîje hevdu  
derdo derdo  
derdê min  
derdê min ê giran  
bila diya te bimire  
bila mala te bişewite  
bila xof û derd bikeve canê te  
ax derdo derdo  
ax desto desto  
min wêran û dêran neke...

## Xwezî...

Xwezî te bizanibûya rojên bê te  
 çiqas zor in çiqas dijwar in  
 xwezî te halê min ê belengaz bidîta  
 eywax lê eywax ji dlê min ê belengaz re  
 hezar car eywax  
 dilo dilo  
 tu yê jî wisa biketa derdê evînê derdê hesretê  
 tu yê jî wisa bigiriya  
 xwe bavêta bextê zalimekê  
 tu yê jî bibûya koleyê çavêن xweşik û nazenîn  
 tu yê jî bibûya êsîrê bêhna wê ya kujerî  
 eywax li min eywax ji dilê min ê belengaz re  
 hezar car eywax  
 dilo dilo gidîno dilo  
 te yê jî wisa êş û azar bikişanda  
 tu yê jî biketa nava kul û derdan  
 êdî nikarim bê te bijîm  
 were dengê dilê min ê belengaz  
 were min tenê nehêle  
 were min bê xwe nehêle  
 gidî gidî xezalê  
 gidî gidî delalê  
 gidî gidî nazdarê  
 were min bê xwe di nava êş û eleman de nehêle  
 nehêle... were...

## **Min bibe...**

min bibe cihekî dûr  
ji vî bajarî dûr  
ji van mirovan dûr...  
keziyêن min ên reş bibe  
dêmêن min ên sor bibe  
xeyalêن min ên birîndar bibe...  
êşen min bijmêre  
hêstirêن min vexwe  
eşqa min veşêre...  
min bibe... min bibe...

## Helbestê dînik...

bêdena wê ya spî û spî  
wekî şîrê spî,  
bêhna xwe ya beybûnî belav dikir cegera min  
min diheland  
min perîşan dikir...  
ceger diteqiya,  
di mîrga odehyê de  
mehîna min heyfa rojên tenê  
heyfa rojên bêkes distand  
kulîlkîn qedexe bêhn dikir  
bi ava kaniya min  
tenêtiya xwe dişuşt,  
guneh qedeh bi qedeh dihate rijandin  
gunehkarî bêxem bêxem dihate jiyîn  
di navbera me de  
bi tenê tazîtî û eşq...  
min didît ku  
hevşabûnên dînik  
di bedena wê de  
dibûn helbestê dînik  
min dinivîsand  
wê dixwend...

## Tenûr...

di tenûra şeva min de  
nalenal û axîn  
keskesora çavan  
lorika derewan  
girînên xam  
kenêñ dêlikî...  
arê tehl  
nanê petî  
tehmeke germik û xweşik...  
di tenûra şeva min de  
nalîn... keskesor... dêlikî...  
di tenûra şeva min de  
axîn... girîn... derew...  
di tenûra şeva min de  
ar... nan... tehm...

## Vê sibehê dîn bûme...

dixwazim di bedena te de bişewitim  
dixwazim di bedena te de biteqim  
dixwazim di bedena te de bimirim  
dixwazim di bedena te de bibim "ez"...  
vê sibehê... dîn bûme...

## Zimanê min...

zimanê min bûye qijikek  
di ewr û esmanên te de  
difire  
fink davêje...  
tu bixwazî  
bi tifinga xwe bikuje  
tu bixwazî  
têxe qefesa dilê xwe kedî bike...  
zimanê min bûye qijikek  
xwe avêtiye ber bextê te...

## Şekirê qendîlê ez im...

şekirê qendîlê ez im  
min bimije  
bi zimanê xwe yê şêrîn  
şev û roj bimije  
têr bimije...  
şekirê qendîlê ez im  
min bixwe  
bi devê xwe yê biçûk  
şev û roj bixwe  
têr bixwe...

## Lê bêyî xapandinan...

piştî ewqas têkçûyînan  
dilê min dixwest ku  
dîrokeke nû  
çîrokeke nû  
paşerojeke nû biafirîne  
dil birçî bû  
dil tazî bû  
dil perîşan bû...  
piştî ewqas girînan  
dixwest ku  
romaneke serkeftî û bêdawî binivîse  
jiyanek aram û bextewar ava bike

dil birîndar bû  
dil hilweşiya bû  
dil rezîl bû...  
piştî ewqas êşan  
dixwest ku  
xwe bike “te”  
te bike “xwe”  
heta mirinê bi te re bibe yek  
dil pêxwas bû  
dil qeşmer bû  
dil beredayî bû...  
piştî ewqas derdan  
dilê min dixwest ku  
tu bibî derman  
tu bibî can  
tu bibî canan  
lê bêyî xapandinan  
lê bêyî derewan...

## Bike... bêje...

yên di hişê xwe de bêje  
dijûnan bike  
nifîran bike  
gotinan bike lê bike  
peyv sar be jî  
tehl û jehr be jî bike  
bike: bi şûrê devê xwe  
bike: bi hêrsa nalînê xwe  
bike: xeydok bi xeydok  
lê bêdeng nemîne  
bêdengî te dikuje  
bêdengî me dikuje...  
yên di dilê xwe de bêje  
dil biqîre jî  
bigirî jî bêje  
sozêñ evînê biqedê jî  
qewl û qerarêñ me xera be jî bêje  
bêje: eşq birîn e heram e  
bêje: tu zivistan î dicemidim  
bêje: tu mirin î-ewqas-qediya  
lê bêdeng nemîne  
bêdengî min dikuje  
bêdengî me dikuje...

## Ziman nîne...

ziman nîne  
şekir e  
şerbet e  
şîr e  
hingiv e  
de were nemije  
de were bisekine...  
dev nîne  
afat e  
agir e  
roj e  
jiyan e  
de were nexwe  
de were bisekine...

## Ka guhdarî bike...

birînê birînê ev jî çîroka min e  
ka guhdarî bike  
ka lê binêre me çi êş kişandine  
bavê min hat kuştin di hewşa mala me de  
bi heftê gulleyan  
ji aliyê heft kesan ve  
bêhna cesedê wî hê jî  
di hewşa mala me de digere...  
gotin ku: birakujî ye...

birînê birînê ka guhdarî bike  
birayê min ê biçûk li çiyê hat kuştin  
bi heftê gulleyan  
ji aliyê heftê kesan ve  
li ser cesedê wî nivîsandibû  
“ez bi azad nejiyam  
lê ez ê bi azad bimirim”...  
bêhna cesedê wî  
hê jî derdora gundê me de digere...

birînê birînê ka guhdarî bike  
bi heft rojan  
ji aliyê heft kesan ve  
êşkence li min hat kirin  
di bedena min de  
hê jî şopên destê wan hene...  
birînê birînê em birîndar in...  
wekî te  
wekî herkesî...

## Tu bibe dêlika min...

tu bibe dêlika min  
ji ber ku  
dêlik dizanin qedr û qîmeta evînê,  
bêhesab hez dikin...  
tu dêlikane bikene  
ji ber ku  
kenêwan azad in  
kes nikare zincîr bike, qedexe bike...  
tu bibe dêlika min  
ji ber ku  
ew jî wekî min bindest in,  
ji cenetê hatine qewirandin  
sefil in perîşan in...  
tu dêlikane bigirî  
ji ber ku  
girînên wan ji dil in, tu xapandin tuneye  
dildar in dilsoz in...  
tu bibe dêlika min  
di dergûşa dilê xwe de  
min hembêz bike, bipêçe, mezin bike...  
her tim hez bike...

## **Em derewkar in...**

ez derewan dikirim  
derewên tazî  
derewên genî  
derewên rizyayî  
derewên mîrkuj

tu derewan difiroşî  
derewên reş  
derewên spî  
derewên pembe  
derewên pûç

ez derewkar im  
tu derewkar ï  
em derewkar in...

### **Beden... şev... ew...**

bedeneke xam  
deng û awaza şevê diçirîne  
li hêviya min e  
bi gotinêñ lorî lorî  
bi daxwazêñ canî canî  
bi nazêñ kedî kedî...

bedeneke tî û birçî  
li benda min e  
diqîre, dilore, distre  
bi tililiyan  
bi lîlîliyan  
bi govendan  
bi nifiran...  
beden... şev... ew...  
li benda min e...



